


TEZAUUR LITURGIC
1 APRILIE

ACATISTUL
SF. CUVIOASE
MARIA
EGIPTEANCA
III



MOSCOVA, 2000



Акафист преподобной Марии Египетской

Кондак 1

Избранней от Господа во образ спасения всем грешным и отчаянным, из глубины греха востекшей на высоту безстрастия, похвальная пения приносим ти, мати преподобная. Ты же, яко имущи дерзновение к щедрому Богу, молитвами твоими настави на стезю твоего покаяния любовью зовущих ти:
Радуйся, преподобная мати Марие, чудо Божия милосердия.

Икос 1

Ангел возбрани тебе, в тине блудней пребывающей, внити в церковь с народом, текшим на поклонение Честному Кресту Господню. Егда же ты отступи в студе и нечаянии, коснуса очесем сердца твоего свет разума спасительнаго. И начат убо плакати, и рыдати, и в перси бити, воздыхания из глубины сердца износящи. Мы же таковое покаяние твое прославляюще, со благоговением я радостию глаголем ти сице:
Радуйся, мглы греха избежавшая;

Радуйся, тучами слез душу свою уяснившая.
Радуйся, к ревности жития непорочнаго усердно себе воздвигшая;
Радуйся, покаяния светом сердце свое озарившая.
Радуйся, целомудрия зеркало;
Радуйся, Духа Святаго жилище.
Радуйся, Горняго мира украшение;
Радуйся, Ангелов и человеков радование.
Радуйся, преподобная мати Марие, чудо Божия милосердия.

Кондак 2

Видящи, святая, в притворе храма икону Владычицы, рече к Ней: «О, Дево; рождшая плотию Бога Слова! Буди ми Ты Поручница достовернейшая к Рожденному из Тебе, яко уже ктому телесе моего не имам осквернити блужением. Повели, Владычице, да и мне, недостойней, невозбранен вход будет в церковь, да узрю Честное Древо, на немже пригвоздися Сын Твой, и воспою Ему с благодарением: Аллилуия».

Икос 2

Уразуме, Марие, тайны Божия, и како готов есть приимати кающихся, егда без труда вниде внутрь церкви и Животворящего Креста древо видети сподобися. Сего ради паки притекла еси

к честному образу Пресвятыя Богородицы и смиренно молила еси Владычицу, да будет ти спасения Учительница, руководствующи к покаянию, и да управит путь твой. Мы же, видяще твое неотступное упование на милость Царицы Небесныя, радуящися, поем ти:
Радуйся, яко креста образ возжелавши видите, себе миру распяла еси;
Радуйся, яко Христа всем сердцем возлюбила еси.
Радуйся, с верою и любовью понесшая крест свой и Христу последовавшая;
Радуйся, Поручницею Матерь Божию стяжавшая.
Радуйся, яко сласти отбегши, чистоты возжелала еси.
Радуйся, яко показала еси нам стезю ведущую к жизни негиблущей.
Радуйся, ищущим пути ко спасению наставнице благодатная;
Радуйся, крепостию произволения твоего демоны посрамившая.
Радуйся, преподобная мати Марие, чудо Божия милосердия.

Кондак 3

Силою любве утверждающися, день той в пути к реце Иордану ты, блаженная Марие, сконча по гласу Владычицы: «Аще, Иордан преjdeши, добр

покой обрящещи». Достигши же святые реки, от
ея воды рuce и лице умы и в церкви святого
Иоанна Крестителя причастися Животворящих
Таин Христовых. И посем воспела еси со
умилением Богу: Аллилуия.

Икос 3

Имущи полтретья* хлеба, не устрашилася еси,
яко горлица пустыннолюбивая и яко елень,
жаждущий на источницы водныя, устремитися,
всеблаженная мати, в пустыню. Темже таковую
твою ревность ублажающе, со умилением зовем
ти:

Радуйся, в церкви проповедника покаяния
причастившаяся;

Радуйся, в Крестителеве обители, пустыни,
вселившаяся.

Радуйся, прелести мира сего спасения ради
презревшая;

Радуйся, временная и земная уметы быти
вменившая.

Радуйся, яко равноангельскому житию
подражала еси;

Радуйся, яко вся прилоги мира, плоти и диавола
победила еси.

Радуйся, скорогибнущих благ мира сего
отвержение;

Радуйся, пустынножителей красото.

Радуйся, преподобная мати Марие, чудо Божия милосердия.

Кондак 4

Бурю внутрь имела еси страстей губительных, яко со зверьми лютыми, с похотьми безумными борющися в пустыни. Огнь бо внутрь сердца страстного возгарашеся и всю паляше тя. Ты же, слезящи и в перси биющи, воспоминала еси обеты, яже сотворила бе, исходящи в пустыню сию, и молила Матерь Божию отгнати от тебе помышления, сие ты смущавшая. Темже мы, недостойнии, Богу, укреплявшему тя, поем: Аллилуия.

Икос 4

Имела еси, Марие преславная, небо покровом и землю одром упокоения телу, зноем опаляемому и мразом померзаемому, емуже ни малаго угождения не попускала еси, да не возобладает плоть над духом твоим, любовью ко Господу пламеневшим. Мы же, слышаще твое пачеестественное терпение и многая злострадания, приносим ти от усердия нашего песноглашения сия:

Радуйся, многия скорби и беды претерпевшая;

Радуйся, молитвою своею вся побеждавшая.

Радуйся, самоотвержение чудное показавшая;

Радуйся, столпе терпения и утверждение

добродетели.

Радуйся, яко страсти плотския мечем
воздержания посекала еси;

Радуйся, яко струями слез твоих пустыню всю
напоила еси.

Радуйся, мученице безкровная, за Христа в
пустыни страдавшая;

Радуйся, в женстем естестве крепость мужескую
показавшая.

Радуйся, преподобная мати Марие, чудо Божия
милосердия.

Кондак 5

Боготечную звезду зрящи пред собою,
Поручницу твою, Матерь Божию, помышляла
еси Ю преступление твое судящую и мучение за
преступление грозно показующую, повергала
себе на землю и не восставала еси день и ночь,
непрестанно просящи помощи у Пречистыя
Богородицы, Юже и воистинну Помощницу
имела еси, вопиючи Богу: Аллилуия.

Икос 5

Видевше, блаженная мати, свет сладкий, тя
осиявающий, от треволнения изымающий и
помыслы греховныя отгоняющий, удивлялася
еси несказанному милосердию Божию, и яко вся
возможна человеку о укрепляющем Бозе, Егоже
силою в немощней плоти Великия подвиги

совершила еси и многия страдания претерпела еси любви ради Христовы. Мы же приносим ти многохвальное пение, с веселием зовуще:

Радуйся, от единого Господа спасения искавшая;

Радуйся, к Матери Его со слезами горькими припадавшая.

Радуйся, яко, на икону Владычицы мысленно взираючи, страстей наветы посрамляла еси;

Радуйся, яко болезнями многими здравие души стяжала еси.

Радуйся, телесная движения и разжжения воздержанием поистинне изсушившая;

Радуйся, страстей свирепство жительством своим угасившая.

Радуйся, высотой подвига твоего Ангелы удивившая;

Радуйся, житием твоим духи тьмы посрамившая.

Радуйся, преподобная мати Марие, чудо Божия милосердия.

Кондак 6

Проповедника дел твоих избра Господь Зосиму и приведе его в пустыню. Он же надеяся обрести некоего от отец, тамо подвижающагося, иже бы мог пользоваться его, и узрев тя, нагу и черну телом, начат вслед тебе тещи и слезно вопити: «Стани и подаждь ми молитву твою и

благословение ради истиннаго Бога, Егоже ради в пустыни сей живеше и Емуже поеши непрестанно: Аллилуия».

Икос 6

Возсияла еси в пустыни, яко свеща многосветлая, преподобная мати, подвиги твоими. Сего ради узре тя Зосима во время молитвы твоей возвышену яко на локоть един от земли и на воздухе стоящую. Страхом же множайшим содержимь, поверже себе на землю и глагола:

Радуйся, пустынное сокровище, от мира утаенное;

Радуйся, прозрения даром украшенная.

Радуйся, наготу Христа ради носивая;

Радуйся, словом Божиим покрывавшаяся.

Радуйся, научающая нас презирати плоть свою, преходит бо;

Радуйся, поучающая прилежати о души, вещи бессмертней.

Радуйся, великая угодница Христова, в мире премирно пожившая;

Радуйся, первее блудница, ныне же невеста Христова, целомудрием блистающая.

Радуйся, преподобная мати Марие, чудо Божия милосердия.

Кондак 7

Хотя Господь явити дела твоя миру, да величия Божия явлены будут, внуши старцу Зосиме припадати к ногама твоима, умоляя тя не скрыта от него жития твоего. Ты же, яко неимущая добродетелей, поведала еси первее старцу токмо о греховней жизни твоей, скрываючи подвиги и борения в пустыни, всех нас научаючи в смирении взывати Богу:
Аллилуия.

Икос 7

Новое чудо явил есть Господь, показав тя, книгам никогдаже учившуюся, словеса от Священнаго Писания произносящую. Ты же рече Зосиме, удивльшемуся о сем: «Слово Божие живо и действительно учит разуму человека». Мы же, прославляюще Бога, творящего славная и неизреченная, дающего великая любящим Его, зовем ти сие:

Радуйся, воздержанием ум твой просветившая;
Радуйся, добродетелей добротою душу твою облиставшая.

Радуйся, смирением высокая стяжавшая;
Радуйся, нищетою богатство нетленное снискавшая.

Радуйся, Божественными видениями и детельми душу свою украсившая;

Радуйся, честне приятелище Духа Святаго.

Радуйся, непостыдное христиан прибежище;
Радуйся, Ангелов собеседнице и преподобных
жен похвало.

Радуйся, преподобная мати Марие, чудо Божия
милосердия.

Кондак 8

Странное и дивное смирение явила еси, егда
просила старца: «Заклинаю тя воплощением
Слова Божия молитися за мя, блудницу, и да
никомуже речеши о мне, дондеже Бог от земли
возьмет мя. В пост же грядущаго лета не
преходи Иордан, но в день таинственных вечери
возьми от Тела и Крови Христовы и пожди мя на
оной Иордана стране, да, пришедше, причащуся
Пречистых Даров, ихже усердно желаю, и абие
прославлю Всещедрого Бога, зовущи Ему:
Аллилуия».

Икос 8

Весь бе трепетом объят, Зосима поклонися до
земли и целова место, идеже стояху стопы ногу
твоею, и возвратися, хваля и благословя Христа
Бога нашего. Лету прешедшу, сотвори Зосима
завещанное ему и седе на брезе Иорданове,
ждый тя, честная мати, слезя и помышляя: «Увы
мне, несть корабля, и како Иордан преидет и
приидет ко мне, недостойному». Мы же,
благодать, данную ти свыше, познавше,

ублажаем тя звании сими:

Радуйся, из глубины греха на высоту
безстрастия востекшая;

Радуйся, в пустыни непроходней едина с
единым Богом пребывшая.

Радуйся, яко душу твою к безстрастию
возвысила еси;

Радуйся, яко чистоту душевную и телесную
стяжала еси.

Радуйся, даров Святаго Духа вместилище;

Радуйся, Церкви Христовы Божественное
удобрение.

Радуйся, яко Ангели Божии дивятся чистоте
твоей;

Радуйся, постников высоту и преподобных
славо.

Радуйся, преподобная мати Марие, чудо Божия
милосердия.

Кондак 9

Всякое естество ангельское удивися, егда виде
тя знаменем крестным Иордан знаменовавшую и
купно с тем взошедшую на воду и ходящую
верху ея, яко посуху. Зосима же в страхе хоте
поклониться ти, но ты возбрани ему. Он же,
послушав тя, токмо рече Богу: Аллилуия.

Икос 9

Ветии многовещаннии недоумеют, како восхвалити твою ангелоподобную чистоту, терпение и покаяние, имиже Богу угодила еси и явилася еси равноангельна на земли. Зосима, ужасом содержимь быв от предивнаго видения на Иордане, рече: «Воистинну Бог неложен есть, обещавый уподобити Себе тех, иже по силе своей очищают себе». Темже и мы, ублажающе тя, глаголем сице:

Радуйся, иорданския воды немокренными ногами прешедшая;

Радуйся, на земли небесно пожившая.

Радуйся, страстей твоих образы благочестно истребившая;

Радуйся, изображение добродетелей в души твоей написавшая.

Радуйся, подвигом добрым подвизавшаяся;

Радуйся, плоть твою духови поработившая.

Радуйся, мертвость Иисуса в теле носящая;

Радуйся, воскресения Его славою сияющая.

Радуйся, преподобная мати Марие, чудо Божия милосердия.

Кондак 10

Спасительных Таин Христовых причастившись, рече преподобная: «Ныне отпускаеши рабу Твою, Владыко, по глаголу Твоему с миром...» После сего проси Зосиму в грядущее лето прийти на

онный поток, идеже ему первее собеседова. Он же отвеща ти: «Хотел бы, аще бы мощно было, в след тебе ходити и выну зрети честное лице твое, поя купно с тобою Богу: Аллилуия».

Икос 10

«Стена есть мне и подкрепление глагол Божий, — рече, мати, взявше у старца, просящаго тя подкрепитися, токмо три зерна сочива. — Довлеет сие благодати духовней, хранящей естество души нескверненное». Мы же о сем дивимся и хвалебно зовем ти:

Радуйся, озарившая ум свой сиянием добродетелей;

Радуйся, соделавшая душу твою Божественныя Троицы жилище.

Радуйся, яко коварства вражия оскудеша вся крепким постом и молитвою твоею;

Радуйся, яко слезами твоими уранила еси страстная взыгrania.

Радуйся, воздержанием тела своего плотская стремления истончившая;

Радуйся, мольбами твоими пред Господом и нас от страстей избавляющая.

Радуйся, долготерпеливно упованием на Господа укреплявшаяся;

Радуйся, и нам крепкую веру и надежду подающая.

Радуйся, преподобная мати Марие, чудо Божия милосердия.

Кондак 11

Пение надгробное тебе сотвори Зосима, достигнув, лету мимошедшу, места, еже поток знаменавше, и обрет тя лежащую мертву, лице на восток обращенно имущую. Позна же из надписи на земли при главе твоя имя твое и ужасеся, уразумеv, яко ты, Божественных Таин причастившись, во един час прешла еси путь, иже сам он преиде, двадесять дний трудяся. Тем же дивящеся сему возопи Богу: Аллилуия.

Икос 11

Видев Зосима льва, телу твоему предстояща и лижуца нозе твои, трепетен быв. Знаменався же крестным знамением, верова, яко невредно будет сохранен силою лежащия. Лев же, ископав ров, елико довольно бе покрыти тело твое погребаемое, в пустыню, яко тихо овча, удалися. Зосима же во своя возвратися, хвали Бога и тебе взывая сице:

Радуйся, яко небесную достигла еси жизнь нескончаемую;

Радуйся, яко сподобилася еси с девами внити внутрь чертога Жениха твоего и Владыки.

Радуйся, венцем безсмертныя жизни от Господа увенчанная;

Радуйся, во обители райския со славою
восприятая.

Радуйся, яко ныне со Ангелы ликуеши;

Радуйся, яко ныне на небесех Владыце всех
предстоиши.

Радуйся, молитвеннице о нас непостыдная;

Радуйся, заступнице наша непобедимая.

Радуйся, преподобная мати Марие, чудо Божия
милосердия.

Кондак 12

Благодать, данную ти от Бога, введуще,
восхваляем твое в подвизех изрядное житие и
просим тя, мати блаженная, помози нам в
чистоте и целомудрии пожити, укрепи,
богоблаженная, молитвами твоими и нас, да
сподобимся выну воспевати хвалебную песнь
Богови: Аллилуия.

Икос 12

Поюще подвиги многострадальнаго и
предивнаго жития твоего, славим и ублажаем
тя, преподобная, яко многомощную
молитвенницу о нас пред Господем. Не забуди
нас, почитающих имя твое святое и взывающих
ти:

Радуйся, призывающим тя теплая
молитвеннице;

Радуйся, от Господа всех благих нам

подательнице.

Радуйся, изнемогающих в брани укрепляющая;

Радуйся, унывающих скоро ободряющая.

Радуйся, в бедах и скорбех помощнице нам
благодатная;

Радуйся, страждущих целительнице скорая и
чудная.

Радуйся, от плотския брани молящихся к тебе
избавляющая;

Радуйся, яко твоим пособием сокрушаются
козни вражия.

Радуйся, преподобная мати Марие, чудо Божия
милосердия.

Кондак 13

О преславная и предивная мати Марие! Молися
присно Христу Богу нашему даровати нам
грехов оставление и жития исправление, да тако
Небеснаго Царствия наследницы будем, в
радости поюще с тобою и со всеми святыми
Спасителю нашему благодарственную песнь:

Аллилуия.

Этот Кондак читается трижды, затем 1-й Икос
«Ангел возбрани тебе...» и 1-й Кондак «Избранней
от Господа...».

Молитва 1

О великая Христова угодница, преподобная
мати Марие! Услыши недостойную молитву нас,

грешных (имена), избави нас, преподобная мати, от страстей, воюющих на души наша, от всякия печали и находящия напасти, от внезапныя смерти и от всякаго зла, в час же разлучения души от тела отжени, святая угодница, всякую лукавую мысль и лукавые бесы, яко да примет души наша с миром в место светло Христос Господь Бог наш, яко от Него очищение грехов, и Той есть спасение душ наших, Емуже подобает всякая слава, честь и поклонение, со Отцем и Святым Духом, ныне и присно и во веки веков.

Молитва 2

О великая Христова угоднице преподобная Марие! На Небеси Престолу Божию предстоящи, на земли же духом любве с нами пребывающи, имеющи дерзновение ко Господу, моли спасти рабы Его, к тебе с любовью притекающыя. Испроси нам у Великомиловаго Владыки и Господа веры непорочное соблюдение, градов и весей наших утверждение, от глада и пагубы избавление, скорбящым утешение, недугующым — исцеление, падшим — возстание, заблуждшым — укрепление, в делах благих преспеяние и благословение, сиротам и вдовицам — заступление и отшедшим от сего жития — вечное упокоение, всем же нам в день Страшного Суда одесную страны общники быти и блаженный глас Судии Моего услышати:

приидите, благословеннии Отца Моего, наследуйте уготованное вам Царствие от сложения мира, и тамо пребывания во веки получитьи. Аминь.

Молитва 3

О равноангельная и всесветлая Марие преподобная, убелившая ризу души своея в Крови Агнчей и зрящая ныне на небеси невечерний свет Царствия Небеснаго Христова, помяни мя, грешнаго и убогаго раба твоего, в богоприятных твоих к Богу молитвах к защите мя от ловления врага, веси бо его козни и лютую в сем житии на ны брань, даруй ми слезы покаяния, омывающия душевную мою скверну, испроси ми оставление грехов и жития исправление, избави мя от злых моих обычаев, лености и нерадения, научи мя постоянству и крепости в борьбе с моими греховными навыками, напечатлей в сердце моем и уме пресветлый образ тобою любимаго Христа, уязви мою душу Его всепрощающею любовью, да не оскорблю милосердие Его новыми грехами. Умоли о мне и милостивую Поручницу твою, Пречистую Деву Богородицу, да и мне, недостойному, дарует всесильную Свою помощь и наставит на стезю спасения. Во исходе же от сего мира, о мати преподобная, сподоби мя причащения Святых Божественных Таин, в

страшный час смерти помози, на воздушных мытарствах заступи и предстательством твоим отверзи ми двери Небеснаго Царствия, идеже по трудех и подвизех ныне водворяешься, зрящи и прославляющи пресладкаго Искупителя твоего, пришедшаго в мир грешныя спасти и Божественною Своею Кровию омывающаго нас от всякаго греха. Емуже слава, честь и поклонение со Безначальным Его Отцем и Пречистым и Животворящим Духом в безконечныя веки. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**